

職官分紀

總校官編修 臣王燕緒

校對官中書 臣徐秉敬

謄錄監生 臣高瑞相

欽定四庫全書

職官分紀卷四十

總州牧

宋 孫逢吉 撰

書舜肇十有二州十有二牧禹別九州有九牧

周禮八命作牧

史記黃帝置左右大監監於萬國

前漢百官表監御史秦官也掌監郡漢省丞相遣使分

刺州不常置武帝元封五年初置郡刺史常奉詔條察

州師古曰漢官典職儀云刺史班宣周行郡國省察治狀黜陟能否斷治冤獄以六條問事非條所問即不

省一條強宗豪右田宅踰制以強凌弱以衆暴寡二條二千石不奉詔書遵承典制背公向私旁詔牟利浸漁百姓聚斂為奸三條二千石不恤疑獄風厲殺人怒則任刑喜則淫賞煩擾刻暴剥截黎元為百姓所苦山崩瓦裂秋祥訛言四條二千石選舉不平苟阿所愛蔽賢寵顧五條二千石子弟恃怙榮勢請託所監六條二千石違公下比阿附豪強秩六百石員十二人成帝綏和通行貨賂割損正令

元年更名牧秩二千石哀帝建平六年復為刺史元壽二年復為牧

郡守秦官掌治其郡秩二千石有丞邊郡又有長史掌
兵馬秩皆六百石景帝中二年更名太守何武與翟方
進奏曰古選諸侯賢者以為州伯今部刺史居牧伯之
任秉一州之統春秋之義用貴理賤不以卑臨尊刺史
位下大夫而臨二千石輕重不相準請罷刺史置州牧
以應古制奏可朱博奏言漢家至德溥大宇內萬里立
置州縣郡刺史奉使典州督察郡國吏民安寧故事居
部九歲舉為守相其異才功效著者輒登擢秩卑而賞

厚咸勸功樂進前丞相方進奏罷刺史更置州牧其真二千石位次九卿九卿闕以高第補其中材則苟自守而已竊恐功效陵夷姦宄不禁臣請罷州牧置刺史如故奏可

後漢百官志十二州每州刺史一人六百石本注曰秦有監御史監諸郡漢興省之但遣丞相史分刺諸州無常官孝武帝初置刺史十三人秩六百石

古今注曰常以春分行部

郡國各遣一吏迎界上

成帝更為牧二千石建武十八年復為刺

史十二人各主一州其一州屬司隸校尉諸州常以八月
巡行所部郡國錄囚徒考殿最初歲盡詣京都奏事中興
但因計吏偕有從事史假佐本注曰員職畧與司隸同無
都官從事其功曹從事為治中從事豫州部郡國六冀州
部九兖州部八徐州部五青州部六荊州部七揚州部六
益州部十二并州部九幽州部十二涼州部十一交州部
七凡九十八其二十七王國相其七十一郡太守其屬國
都尉屬國分郡離遠縣置之如郡差小置本部郡名世祖

并省郡縣四百餘所後世稍復增之靈帝中平五年改刺

史新置牧當邊戍者丞為長史

古今注曰建武六年三月令郡太守諸侯相病丞長

史行事十四年罷邊郡太守丞長史領丞職

王國之相亦如之

漢官解詁太守專郡信理庶績勸農賑貧決訟斷辟興利除害檢察郡奸升善黜惡誅殺殘暴者也

東觀漢記州牧刺史漢舊官建元元年復置牧十八年改為刺史督二千石

晉職官志州置刺史別駕治中從事諸曹從事等員所領

中郡以上及江揚朱提郡各置部從事一人小郡亦置一人又有主簿門亭長錄事記室書守佐從諸曹佐守從事武猛從事等凡吏四十一人卒二十人諸州邊遠或有山險濱近寇賊羌夷者又置弓馬從事五十餘人徐州又置淮海涼州置河津諸州置都州從事各一人涼益州置吏八十五人卒二十人荊州又置監佃督一人郡皆置太守

宋百官志刺史州各一人刺史之為言猶參覘也寫言亦

謂之制刺漢制不得刺尚書事是也郡守秦官秦滅諸侯隨以其地為郡置守丞尉各一人守治民丞佐之郡當邊戍者丞為長史晉江左皆謂之丞尉典兵備盜賊漢景帝中二年更名曰大守尉曰都尉光武省後置東部西部都尉有蠻夷又有屬國都尉漢末及三國以為諸部都尉晉成帝咸康七年又有都尉郡丞宋太祖元嘉四年復置郡官屬畧如公府無東西有功曹史主選舉五官掾主曹事部縣有都郵門亭長又有主記史催督期會漢制也畧如

之諸郡各有舊俗諸曹名號往往不同

南齊百官志魏世州牧隆重刺史任重者為使持節都

督輕者為持節督起漢帝時御史中丞馮獻討九江督

揚徐二州軍事而徐爰宋志云起魏武遣詣州將督軍

王珪之職儀云起光武並非也晉太康中都督知軍事

刺史治民各用人惠帝末乃并任非要州則單為刺史

州置別駕治中議曹文學祭酒諸曹部從事史郡太守

大史部縣為國為內史相

此段未詳

隋百官志梁州刺史二千石受拜之明日辭宮廟而行
州置別駕治中從事各一人主簿西曹議曹從事祭酒
從事部傳從事文學從事各因其州之大小而置員陳

承梁制荆江南兗郢湘雍等州刺史

六州加督進在第三品東揚州下加

都督進在第二品右光祿下

庶姓為州無將軍者謂之單車後魏天

錫二年制諸州置三刺史皇室一人異姓二人皆古之
上中下三士也後齊司州置牧屬官有別駕從事史治
中從事史州都主簿西曹書佐記室戶曹功曹金曹租

曹兵曹騎曹都官法曹部郡等從事員上上州刺史置
府屬官有長史司馬錄事功曹倉曹中兵等參軍事及
掾史主簿及掾史記室掾史外兵騎兵長流城局刑獄
等參軍事及掾史參軍事及法墨田鎧集士等曹行參
軍及掾史右戶掾史行參軍長兼行參軍督護統府錄
事統府直兵箱錄事等員州屬官有別駕從事史治中
從事史州都光迎主簿主簿西曹書佐月令及史祭酒
從事史部郡從事卑服從事典籤及史門下督省事都

錄事及史箱錄事及史朝直刺姦記室掾戶曹田曹金
曹租曹兵曹左戶等掾史等員上上州府屬官佐史合
三百九十三人上中州減上上州十人上下州減上中
州十人中上州減上下州五十一人中中州減中上州
十人中下州減中中州十人下上州減中下州五十人
下中州減下上州十人下下州減下中州十人自州郡
縣各因其大小置白直以供其役上州刺史三品下州
刺史四品後周雍州牧九命戶三萬以上州刺史正八

品二萬以上八命一萬以上正七命五千以上六命靜
帝大象元年總管刺史及行兵者加持節餘悉罷之隋
高祖雍州置牧屬官有別駕贊務州都郡正主簿錄事
西曹書佐金曹戶兵法士等曹從事部郡從事武猛從
事等員并佐史合五百二十四人上上州置刺史長史
司馬錄事叅軍事功曹戶兵等曹叅軍事法士曹等行
叅軍行叅軍典籤州都光初主簿郡正主簿西曹書佐
祭酒從事部郡從事倉督市令丞等員并佐史合三百

二十三人上中州減上上州吏屬十二人上下州減上
中州十六人中上減上下二十九人中中減中上二十
人中下減中中二十人下上減中下三十二人下中減
下上十五人下下減下中十二人州置總管者列為上
中下三等總管刺史加使持節雍州牧從二品上州刺
史從三品下州刺史從四品開皇三年罷郡以州統縣
改別駕贊務為長史司馬舊周齊州郡縣職自州都郡
縣正以下皆州郡將縣令至而調用理時事至是不知